

四庫全書

集部

欽定四庫全書

佩韋齋集卷十

宋 俞德鄰 撰

序

竹間俚語序

竹之清自淇澳詩作世愈知所貴重繇晉而下愛竹若
子猷輩不知其幾也其為人類皆如瑤林玉樹灑然風
塵之表洩汨迂疎若余之不肖者弗愛也而余也一畝
之宅有盈弓隙地必手植數竿朝吟暮詠其趣至山巔

水涯風巾雨屨恍然相遇輒流連竟日不忍棄捐噫何
所好之異余所為也雖然是足為竹辱抑竹比德于君
子外雖稜稜高節而中虛無我若善容物者故其人雖
不類苟愛之亦必以清標雅趣相延接如余之愚坐每
對竹蚓竅蠅聲即隨觸而啓則竹信有德于余者余方
依食于奔走卒未能與竹相朝夕天其或者飯一盂蔬
一盤優游于畎畝間將卜背山臨流之地以為此君所
攜琴負書相從終始庶無忘此君之德也清風明月實

聞此言

送尋賢相士序

辛酉涂月子客於京師有方士歛于門曰吾聞子之聲
矣未睹子之面也今眡子若有合于予者子他日必有
名聲于天下雖然吾無求于子願以詩若文質于我余
曰子之術非我所知也予聞古有虛無子者挾其術以
行一日抵曠野遇老人衣縫掖之衣桐冠櫟鞋虛無子
進而揖之叟曰子為誰曰吾姑布子卿之流也叟風神

清越灑然若游蒙穀期汗漫于九垓之上者老人喜止以宿輒饗飧勞之且以二子見虛無子矍然曰異哉其長也眈眈虎視萬里侯也其幼則軒軒霞舉光彩照映廊廟器也言未既老人泣然流涕曰余何為而至此極也虛無子曰叟豈禦富者邪今叟之居蓬蒿所翳狐狸所嗥雖無預于世然叟則已病矣之二子年未壯連印磊落駢組流離便蕃清切烜赫中外而叟則聞以泣何耶老人曰噫是何言也吾聞食人之肉者可隨以鞭扑

之辱乘人之車者可加以鈇鉞之誅使吾樂青紫而羞
常布飫膏粱而厭藜藿則余之禦魑魅也久而况能保
妻子全家室以棲遲於寬閒之野乎此吾所以泣子之
言也子其行矣虛無子瞠然自失詰朝而去返而視叟
之室則已遷矣於戲人之生得為將為相是亦足矣而
叟也猶泣而不忍聞今子以甘言飴我是正余之所戚
戚者而又何以贈子方士無以對遂書以送之

北村詩集序

詩之道大矣先帝王盛時陳詩納言命官職之所以觀
習氣之感而知風化之變也夫惟觀其感知其變和其
忿厲怫鬱之氣以導其易直子諒之心是故化行俗美
禍亂無自而作厥後官廢士之詩瞽之曲師之箴瞍之
賦矇之誦工之諫庶人之謗皆不得以上聞而上之人
亦不得以知民之好惡于是政乖俗謬恬不之覺以至
于壞亂而不可救然則詩詎可以易言哉孟子曰王者
之迹熄而詩亡詩亡然後春秋作知其說者其知詩之

道乎北村湯君子文山陽人也其先君子嘗以功刺南
服君從齒齡即自濯磨于學問聞其屬比使對機辯敏
捷一座愕眙余固竒之逮少長文聲獵獵余蓋瞠乎若
後矣兵燹以來一再遷顧色日悴文日工一日出編詩
遺余余讀之既則又知君之所以為詩矣憫世道之隆
汙悼人物之聚散明時政之得失吟詠諷諫使聞者皆
足以戒焉是豈徒誇競病事推敲者之為哉蓋其易直
子諒之心閔于中而肆于外者也陳詩納言世無其官

其忿厲怫鬱者既蹈語穽而觸禍機有如易直子諒者
又無與颺之以風勵天下余也窮居荒涼乃得優游饜
飫以快心而駭目余之幸多矣雖然余固幸矣詩之幸
不幸余未可知也詩之幸不幸余未可知則氣習之感
風化之變繼自今其醇其疵其厚其薄余益未可知也
余方有負薪之憂廢棄筆墨擇其契余心者數十首命
兒輩錄而藏之因序其端以見君之詩與古之詩淵然
若有合者若夫君詩之傳則不繫于余之序不序也

送陳茂叔序

三代之士以鄉舉里選進故士知修于家而已未有不聞于鄉而達于朝廷者也周衰之末鄉舉里選之法壞為士者始皆游說以媒其身漢襲秦弊挾書之禁未除騎項溺冠至以儒相詬病當是時海內一統而縱橫押闔復無所用之于是豪傑之士如蕭何曹參輩又皆以刀筆吏起風聲氣習浸淫于後故雖立學校舉孝廉策賢良方正而黃霸以卒吏選薛宣以書佐選丙吉尹翁

歸以獄吏選其他繇此途出不可縷舉非士而甘于吏也懷材抱藝鬱不遇時使非以道味自飴則去而為吏事勢然爾秦漢之間舍黃綺四賢之外士之甘于隱逸者幾何人哉然則士之生于三代之下者亦可悲也矣兵燹十年車書雖同科目未設士之通經術工文辭者幾無用于世顛頓狼狽失所操持蓋不忍言矣甚者征徭困之夫役撓之時俗又從而姍笑之及夫發憤為吏則刀筆之末工法律之未究其表表者不過齒名庠序

如申圖一鋪餽而止耳嗟夫何士之重可悲也吾友陳
子乃能傑然自立為名卿賢大夫所知征徭不能困夫
役不能撓時俗不敢姍笑一旦發憤為吏則又刀筆法
律若素習者嘻亦難矣竭來訪別往服厥事豈懷材抱
藝不肯汨沒以故慕蕭曹諸公之所為邪雖然子固賢
于今之所謂士也矣抑子之所隸者漕漕之所權者鹽
東南斥鹵淮為上浙次之閩又次之比年以來權利之
取寢多禁網之設寢密尋捕之員寢夥加以奸貪恣肆

拊斂權剥獲一冒禁之徒根連株逮動至什伯富家巨室至重足屏息以俟其弊皆萌于邏卒成于胥吏而汎濫于轉運使副之為也今尚書李公仲常以潔廉忠信為之先李君仲方以清修勤敏為之佐主人仁賢同列皆君子趨辦之饒會計之當二浙之民賴以蘇息子行矣合以平日之所學者而稟承二公之所行者簿書期會之餘藏修涵養毋惰毋畫則以儒飾吏雖不得為三代之士猶以文母害而為漢之士不然吏其身復吏其

心慘礪酷烈頭會箕斂縱復倍權利而贏之吾不取也
且二公亦安取此哉子剛塞果毅其趨事靜以敏其與
人交忠以信以之為吏疑無是患而吾猶拳拳焉蓋悲
士之不遇而為吏又恐吏之不能吏而愈有愧于今之
士也吾嘗辱知二公而子又嘗辱師于我于其行故無
所顧忌而索言之

紀德緯詩序

余昔游京口聞紀侯以才氣韜畧雄一世而獨刻意教

子蓄奇書連屋客至微風醒酒靜夜聽詩宛然何將軍
家風味也獨未能陪鄭廣文一造焉歲丁丑余歸永嘉
與瓜山孫君會君故紀侯客也問誦侯仲子德緯之詩
澄澹簡易若不以雕鏤鏊鉞為能者余甚奇之然窺豹
一斑殆未覩其完軀也近歸自杭乃聞德緯不鄙固陋
儼然辱于敝廬且盡輯其所為之詩而惠教焉余雖未
能躡履起迎拂席共語然景慕其人于二十餘年之前
而讀其詩于二十餘年之後得無躍然喜倘然止闕然

而立者乎雖然詩難言也平易者近淺艱深者近怪事
謬則語難理誣則氣餒斯皆詩之所忌而非周游萬里
涉獵萬卷者不能知也德緯從少年游江淮沅湘踰
嶺適越凡東南幽奇瑰偉之觀亦既飫聞而饜見之矣
今又投簪解紱恣睢遙蕩于鐵甕鍾阜間日與德人勝
士紬今繹古則其進于詩者殆未止也余敢以昔之所
聞今之所見而遽謂足以盡德緯之詩乎序以識之尚
有覲于嗣音云爾

送劉伯宣尚書序

太原劉公亭刑江右之二年政成化洽治最上聞遂以
大宗伯召去之日耄艾攀車童稚卧轍學士大夫相率
為歌詩以餞蓋自混一以來士之仕于南者未始有也
而公也獨得比于帶牛珥筆之俗其必有道矣廉潔之
實忠利之教惛怛之心其洽于民也深故民之德于公
也至是殆非可以聲音笑貌為也悒然不樂思吾劉君
何時復來安此下民東都之謠西江之頌均一至誠之

感應而已然則公之歸亦榮矣哉易之象內君子而外
小人則為泰內小人而外君子則為否曩者權儉用事
姦枿充豎布滿要津其流落而不偶者皆君子也幸而
陰霾汎掃皦日昭融端士正人茹連茅拔是正開泰之
一機也致隆平頌清廟跂予望之而三數年來楮帛日
以輕物價日以湧民生日以困姦貪日以肆盜賊日以
滋天災時變昆蟲草木之妖日以呈是豈賢者之無益
於人國哉意必有其故矣公歸本朝於君相聚精會神

之時百執事同寅協恭之際盍孜孜矻矻日夜講求其所以然之故而彌縫之則有小往大來之亨而無城復于隍之患庶乎天下後世知君子之可與有為也不然為爾寂寂彼小人者亦將笑君子于地下矣何哉天下之事誤于小人者則君子議之誤于君子萬世謂何此古人所以鞠躬盡力死而後已者正恐為小人之議而貽千萬世之羞也德鄰辱知于公最深故餞公之行以規而不以頌

山雞自愛集序

歲乙酉八月余以事如山陽憩天慶觀頽垣敗壁蝸蚓縱橫莎徑荒涼間無人跡淒然有離索之感已而思之導江張君吾畏友也實講道于茲淮上翁吾忘年交也又實寓乎是亟往訪焉二君輟食迎門相與談別後事而旅懷藉是釋矣暇復造之因而扣其所謂耆傳碩彥騷人勝士願一見之淮上翁蹙然曰節孝往矣九京可作節義如廉州者可復見哉門禧以來兵事劬勸此地

眊為邊徼無日不鞭弭囊鞬與敵境從事焉用毛錐子
哉以故士之學者鮮間有之舍科舉之外餘無習焉獨
平野陳君不以時之盛衰易其志之好尚執筆苦吟鉤
章棘句積歲月畧不憚煩余間而愛之然未暇請也暨
抵導江亦以陳君為稱首上丁釋奠于學余齋邀觀禮
適會陳君于稠人廣衆中一揖而退復未暇請既而陳
君來訪聽其議論纒纒會又咏其詩章淵淵有韻余于
是益愛之又一日以山雞自愛一集屬余而為之序開

卷讀之則又知治書吳公之所以愛君者矣夫山雖照
水愛其文也君詩然乎哉君之詩君自愛之導江愛之
淮上翁愛之治書吳公深愛之余亦從而愛之則君之
詩其斧藻絢麗從可知矣山雖然乎哉雖然詩之作不
作在我其愛不愛在人語以人不知而不愠為君子易
以不見是而無悶為潛龍古之君子未嘗求人之知覬
人之愛也君誠能以道自勉反身而誠取人為善極而
至于深造自得之地則人之愛我者未必非美疢也其

惡我者未必非藥石也况肯自愛乎人之愛與不愛尚不足為君重輕也况余之序與不序乎重違君之請姑以是復將命者云爾

與屯提刑樂府序

樂府古詩之流也麗者易失之淫雅者易鄰于拙求其麗以則者鮮矣自花間集後迄宋之世作者殆數百家雕鏤組織牢籠萬態恩怨爾汝于于喁喁佳趣政自不足然才有餘德不足識者病之獨東坡大老以命世之

才游戲樂府其所作者皆雄渾奇偉不專為目珠曉鉤
之泥以故昌大器庶如協八音聽者忘疲渡江以來稼
軒辛公其殆庶幾者下是折楊皇荂誨淫蕩志不過使
人嗑然一笑而已疆土既同乃得見遺山元氏之作為
之起敬至元丙戌余留山陽憲使奧屯公以樂府數十
闕示豪宕清婉律呂諧和似足以追配數公者嘗試觀
之如取驂騑飾以金鑣玉勒所謂馳驟于白帝城水雲
之外江村野堂爭入吾目已而垂鞭羶鞚恣睢凌厲于

紫陌間一何奇也然則舍坡老稼軒遺山外如公者其
詎肯兄視餘子哉雖然是特公之餘事也余嘗與張君
達善讀公之詩鏗鏗幽眇發金石而感鬼神及造公之
廬几案間閒無長物惟義文孔子之易薰爐靜坐世慮
泊如超然若欲立乎萬物之表者是余之于公知之淺
矣不知深矣即區區樂府視公不幾于管窺而蠡測者
乎余故表而出之使後之從公游者當求之于未始出
吾宗之趣而杜德衡氣殆未足以盡壺子也

劉媪搏虎圖詩序

已卯夏有客自北來持劉媪搏虎圖並歌詩若干首謂
余曰媪渤海濱州人也姓胡氏事劉平生二子劉戍南
陽媪攜子以從至沙河之澣日已暮即道左宿焉夜半
叢薄中虎驟然勃起遽攫劉以去媪驚寤提刀逐虎踰
數十武及之虎棄劉呀呀人立勢欲搏媪媪直前刺之
虎應刃而斃遂掖劉以歸閱三日劉乃死事聞于官南
陽守義之請于朝與蠲其力役于是好事者圖而歌之

余曰異哉天下之至猛者虎也至懦者婦也以懦婦角
猛虎其與虺蜥撼樹穀靡抗獄者何異而况發于卒然
忽然之際雖武夫悍將猶將戰掉而奪常茲媼也乃能
斃是虎于尺刃之下是豈專以力勝哉義激于中忿形
于外蓋不知虎之為虎而婦之為婦也老子曰抗兵相
加哀者勝矣茲媼其哀者與又曰禍莫大于欲得茲虎
其欲得者與故嘗謂漢宮之媛能忠其主而無格熊之
力泰山之婦能哭其夫而無暴虎之勇如媼者勇足以

濟其義力足以全其軀其殆婦而夫者與雖然夫者婦
之天也父者子之天也君者臣之天也為臣死忠為子
死孝是皆天理民彝之大者近世之公卿大夫士庶平
居暇日苟富貴徽榮寵矜能銜智自以為百夫之特夫
孰肯以妾婦自比一旦君父有難觀望畏怯曾不能橫
一草以救之其視茲媼何如也甚而甘心焉又因之以
為利聞媼之風宜可以愧死矣客題余言因書之俾綴
于詩歌之後

送牛子明序

余往歲識牛君子明于揚識其面未識其心也異時從御史李君漢卿及今尚書劉公伯宣游其于子明盛有所稱引余于是知其非庸庸衆人矣然亦未詳其素所韞積者矣既而交愈久往來愈熟見其質厚少飾端介不阿余于是愛之且敬之矣歲甲申浙右苦旱子明奉憲司檄來潤行阡陌問民病苦公事畢訪余于蓬蓽之下出句曲山中諸詩清曠簡遠得騷人勝士之趣于是

又知子明之力于學而工于詩也君無何仕不得志投
劾走江淮困頓流離二年于此余甚憐之然其氣未始
餒而其學亦未始廢也近忽來顧謂將如武昌為外臺
主吏掾語已欲別余叩之曰居閒久資用乏絕無以為
達官貴人故交舊友之贄今將稱子本倩善工模瘞鶴
銘華陽洞碑藉手以見余啞然笑曰子明惡用是哉輦
金帛可俟伯府詩書止腐儒世嘗有是言矣子明惡何
是哉且吾聞之昔士有游方之外者歸而媚其婦曰吾

富矣吾富矣其妻喜亟發其篋眠之惟李庭珪墨半丸
歐陽公五代史橐數幅而已妻怫然而怒今欲以是而
媚時貴得無類是乎子明曰世安有盡如茲婦者邪余
曰然則姑行矣子明予不悅余又曰今御史申屠君
清修雅重有為有守茲方以臺命留湖湘間蓋識子明
且知子明者君在亟往雖不假是為贅余意君必能延
子明之譽而張之子明亦惡用是哉于是忻然曰吾可
以行矣遂書以為序

曹之才詩序

因事變懷舊俗詩人之旨也然感慨之深激烈繼之往往蹈語穽而觸禍機者有矣古之詩不如是也惟黍離之什哀而不傷怨而不怒隱然忠厚惻怛者寓焉故聖人錄之此政詩人所當涵泳而紬繹者也曹君之才以詩雄行輩間余聞之已非一日近閱蛟峯翁序語雖愛其夷易磊落美其英華果銳而猶疑其謳吟于吳山之陰所少者感慨之意翁可謂愛人以德矣雖然故宮詞

十九首與夫拜景靈游湖曲登北城悼今思古如余所謂哀而不傷怨而不怒忠厚而惻怛者殆非之才之少也湖光山渌尊酒嘯咏不過寫吾情陶吾性而已三百五篇興觀羣怨豈皆為變風變雅作邪知之才者可無憾于此矣

佩韋齋集卷十

欽定四庫全書

集部

佩韋齋集卷十一至
三

詳校官庶吉士_臣李如筠

主事_臣呂雲棟覆勘

覆校官中書_臣田尹衡

校對官中書_臣王鍾泰

謄錄舉人_臣劉禮

欽定四庫全書

佩韋齋集卷十一

宋 俞德鄰 撰

序

雙蓮圖詩序

隰有荷華鄭詩也而澤陂則以菡萏稱至楚大夫著為
離騷則又有緝芙蓉以為裳之語曰荷曰菡萏曰芙蓉
一也或以喻德或以喻色未始以為瑞也獨宋元嘉中
二蓮同幹生于天泉于是史書之以為瑞是豈不蔓不

枝者其常而同幹者其瑞與然元嘉以前未之聞焉豈
昔者無而元嘉始有之邪否則昔雖有之史闕而不書
也史氏之法祥瑞必書災異必書使古有之而不書則
是不足以為瑞也及觀元嘉而後至于今日嘉蓮之茁
記于史見于騷人墨客之詠累累可數則又未始不以
為瑞也史以為瑞詩人以為瑞則謂之瑞也亦宜而又
何疑于古之無而今之有乎歲柔兆閏茂前潮陽通守
湯君亞卿之南園嘉蓮斯茁里人誇艷見未嘗有姁嫵

奮肆至繪圖而傳視之茲豈偶然之故哉水陸草木之
繁雖非有血氣心知者而一榮一悴或者人事關焉故
君臣和也而同穎之禾出郡國治也而兩岐之麥秀彼
蓮獨不然哉元嘉之政比于文景天泉之蓮盖亦和氣
交暢之所致也大而天下次而一國微而一家和致祥
乖致異一而已亞卿乃祖乃父世篤忠蓋置義田闢義
塾睦于宗黨粲而不殊斯又俗情之所難者以是貽謀
固宜後之人蕃衍盛大今亞卿象賢趾美不敢有越厥

志兄弟怡怡如也愉愉如也其所感應召致瑞有在矣
斯蓮也謂非禎祥可乎余居京口三十有六年所見達
官貴人之家何翅百數兵燹以來陵替亡幾惟湯氏詩
書之澤浚之而益深延之而益袤今又和氣交暢以有
茲瑞吾意湯氏之興未艾也昔熙寧中燕國邵氏實產
嘉蓮已而瓜並蒂桃並實紫芝秀者三當時秦太虛諸
公爭為詩文張大之若亞卿者其可以無述乎友朋約
為歌詩識其事余拙于詩者故首為之序云

送韓仲文赴安豐序

秦罷侯置守漢因之歷魏晉隋唐以迄于宋其藉以承流宣化者曰守而已故守之賢否一郡之休戚繫焉守而賢雖佐理者或貪猥懦弱郡不害其為治何則守之權專以一故也惟今之制則不然惡偏私也而欲公其權懼專擅也而欲分其任于是釐郡之大者曰路次曰散府路設總管府府有達魯花赤有府尹同知治中府判謂之路官若散府則闕治中而不置路官之次有經

歷知事提控案牘謂之首領官若散府則虛經歷而不設每視事路若府官坐正署首領官坐東偏胥史鴈鶩行立凡獄訟錢穀工役之務無有大小率繇胥史白之首領官首領官審其可行行之謂之繫書繫書畢乃白路路官簇坐傳語更相可否是非議克合乃定否則曠時累日不敢決一事以故一府之內得一賢郡未必治而同寮或愿姦易險賢不肖之異則必有銳喙決吻求以誣理而屈法者一不勝即竚言以相詆訐相護詢

甚者掙衣裂眦招呼嘆鳴各以氣勢為勝負朝家患之
則又著為令甲遇路若府官有偏私朋比者聽首領官
庭辨之至再上弗聽則又許疏其事申之部若省然則
首領官雖卑也而權實與路府官等盖非如古之牧守
得自專制其境內而長史司馬以下惟奉行守之命令
而已也提控案牘之選庸非重而不輕也哉京口韓仲
文以積勞求仕茲被省檄主案牘于壽陽將之官友朋
憫其以宏才佐小壘而又詘于下僚各為詩歌勞苦之

噫以仲文之才而縻于是職固可慨也然壽陽于古為六實咎繇所封之地時苗飲犢之池其汴尚湜湜也東限琅琊西距孟諸南引荆汝之利地方千里境物固不惡況朝家之制凡郡事纖悉皆自首領官而達于守貳是則仲文此行其關係于一郡者誠重也誠不輕也未可謂之不遇也仲文彊志有立且其所交皆名人魁士其於為政講之熟矣今又孜孜以文藝為事吾見其以文母害而得譽于時也審矣又何慨焉遂書以送之

送王國華歸東平序

昔孔子高與鄒文李節相善也子高還魯二子別流涕
交頤子高曰人豈鹿豕也哉而同堂羣聚乎嗟夫子高
魯人也吾聖人之後也而其云云若是子生于魯而學
孔氏者也於其別余敢邑邑不樂以貽鹿豕之譏雖然
古之君子以文會友以友輔仁其竝立則相下而不厭
其遠離則相顧而不忍舍是豈過為兒女感哉亦必有
不能忘情焉者矣余生取友高即深求不知其幾兵燹

以來半為鬼錄其或僅存而未化者鮪盤蠖屈銷聲沉響余惻焉既而得張子惟敬於揚繼又得子于潤攷古討今相與上下其論余甚樂之意一二年業之庶幾至乎至也去歲惟敬歸歷下子今又歸東平余雖念子高之言亦惡能無戚戚於此況祖行道飲往來人士靡不與焉而余又以病弗及出亦安得藉子高以自解雖然余之于子固非燕游一朝之好也余將竊仁人之號而送子以言可乎津亭折柳春日載陽嘗試與子俯觀萬

類之盛矣根者莠者芽者甲者舒翹而揚英者皆一氣之春也然其敷華之茂者必其植根之固而朝榮夕悴者非藤蔓之托則葩藻之浮者也人之于文也亦然文者華也彼聖賢者根之以仁義培之以學問又充之以剛大之氣故其發也大者為六經可以經緯天地小者亦傳其徒垂之於簡冊為後世法若夫組織剝剝求以夸多而鬪靡者不過草木榮華之飄風而已吾子齒新而氣宿貌臞而神澤且謙以自牧孳孳焉以求師問友

為務其于為文辭也宜無難矣然以余觀之徃徃締續之功多而涵養之功少余懼其華之浮而根本之未立也子歸與魯賢士大夫遊試以叩之有不以予言為謬者予盍勉之也時幸相遇出所業示余將見其浩乎沛然不止如今日之所觀矣然則是別也余可徒為鄒李之戚戚而無一言以為子贈乎

葛元白詩序

庚寅之秋余遊杭聞葛君元白名於諸友間恨未及識

也暇日偕郭元德詣之居近市而湫隘賈胡販僮僮
徃來輜車柴轂填接街陌余意高人勝士未必處此及
既見矍然一儒目光炯炯若以風裁自持者余心異之
入禧巢去誼囂漸遠間延至閒境左花右竹幽禽嚶嚶
傍牆甃小石為盆池金鱗游泳脩然有濠濮趣蓋不知
其在闌闌中也已而啜茗行酒相與論古今事談辭如
雲出歌詩數十首匠意體物清麗紆婉風雅之致隱然
余因喟然嘆曰元白居塵市之衝而其詩若是孟氏移

氣之說然乎否乎龐德公謂趨舍行止人之巢穴各得其棲託而已若然則居未必果移氣也蕘夫牧豎不迹城邑朝夕游乎山林之間思若清矣求一言之幾乎道藐不可得是果以居論邪抑吾聞元白兄弟怡然于三間茅屋之下孝友之行著于鄉曲是有以帥其氣者矣詩之清也不亦宜乎余方與元德評論及此而元白以詩徵序因錄而歸之

贈京口外醫戚君序

疾子所慎也傳曰醫不三世不服其藥其慎可知矣然
醫而至于三世歷數之不能得一二於千百何其難也
余家京口三十有九年聚而居者衆故不能無疾疾故
不能無醫醫之往來于余門者亦多矣有一至者踰數
年召之則其人已亡矣有再至三至者踰數年過之則
其家為他人居矣問其子孫曰流而為負販也轉而為
溝中瘠也間有能世其業則門戶寂寂而為時人之所
鄙棄也噫是豈多行不義安人之危而繳其利者邪抑

術之不精而輕用之者邪抑藥餌之謬而有所謂天刑
鬼責者邪不然何其傳之難也獨外醫戚君余乃見其
祖子孫五世吁亦難矣夫瘍醫惟祝藥劑殺之劑而已
而癰疽痿痺之疾又非方脈比也凡瘍之作其初如針
芒如粟粒人多易之曾未俄頃骨痛腫潰或至于不可
療以死又非如他疾之可以歲月治也惟其發之遽骨
痛腫潰之亟故世俗之醫往往因之以為利其初作也
以毒藥發之待其呼號痛楚然後要之要之而饜其所

欲然後徐徐而治之治之不蚤腐敗塌裂不可厝手則
又藉五善七惡之說以自解滔滔皆是蓋不獨宣之符
當塗之徐為然也惟君則不然本之以忠信行之以廉
慤人有疾求君視療雖風雨暮夜即負藥奔走略不以
貧富貴賤異其心亦不責報與否間二歲余夫婦各苦
癰君眊之皆不兼旬而愈君嘗曰癰疽譬猶惡人養癰
護疽雖古所戒然攻之太急亦必有意外之禍語曰人
而不仁疾之已甚亂也斯治瘍之法也故吾每視斯疾

惟砭烙以洩其毒宣導以殺其勢其不獲已則以五毒
攻之五藥療之雖不求旦暮之功而疾者良已若夫專
以刀七錐鑿鎌割鏤扶為奇者吾不忍為也君可謂良
也矣噫以是心而充之豈惟醫之良以之處已以之處
人其有惡而不仁者惡能余毒哉君祖父相傳逮今五
世君方積行累功惟日不足吾見其子孫綿衍為時顯
人世醫之報殆未足為君羨也君所居有皂莢木二數
蔭蒙密下庇千牛殆閱百歲視其樹知其家知其家抑

知其人矣非培植之久者能之乎余故樂為之序以彰君之善以勉君之子孫且使其徒慕而效之母為符為徐而為世人之所指目也

梅南詩稿序

詩契於古難也契於古而傳于今尤難也鍊句鍛辭搜攪腸胃敝精神而戛肌骨顧豈貌無可傳者世降俗薄忌者多與善者少指瑕焉而掩其瑜索瘢焉而滌其垢士生斯世竊竊焉幸其詩之傳難乎易乎吾見其難而

愈難矣然詩患不古不患不傳如古也不傳何病不傳
然後見古而況未必不傳邪梅南陳君其為詩雖不多
平澹古雅亦信乎其有可傳者友人張君仲實趙君景
高裒金鋟梓汲汲然思有以傳之噫是可以敦薄俗矣
而或者猶病其鮮焉夫任藩十首麴望江三十首皆託
諸其友自唐世傳至今日詩固不在於多也或者又曰
若然則君之詩盍止於是乎余曰非也君眈心古學磨
礱浸潤極而至于薄風雅躡屈宋雖累數百千言皆可

傳也詩豈厭于多乎哉余讀君之詩因有感于張趙二君之義序而申之將以警夫世之忌而不與善者爾為我謝陳君勉之勉之毋負予之所期而使忌者得以藉口也

送王應夫序

余與王子應夫居相邇情相好也應夫視吾年倍長以里先輩事之余視應夫學聚問辨迨羣而其所為詩文又皆有法度可喜每忘年交之以故情益親徃來益密難

疑答問彼不得而吾得之一日來訪謂分教楚棠行且有日余甚以離索為憂然亦以應夫之得仕為喜應夫蹙然曰邑雖小聞業儒者不下百數吾懷空抱虛一旦竊師民之號深懼夫嘲笑者之不免也子何以教我余曰人之患在好為人師孟氏固嘗有是言也然世之不好為者幾希矣今郡邑凡幾學學凡設幾官其以才學選如子者凡幾人以子之才之學雖舉棠邑之士而師之吾未見其不可也而子自視欲然則過人遠矣雖然

學然後知不足教然後知困吾子今日之欲然者知不足者也師于人而未為人之師學于人而未為人之教則猶未知困者也知不足固能以自及未知困終不能以自強繼自今請業者進請益者進扣大扣小與接與構吾子其知所以自強矣知自強則日就月將晝為宵得皆自此始而又何患乎書曰數學半易曰麗澤兌君子以朋友講習此之謂也余年運而往顛毛種種其不能自強于學也久矣聞邑有芳草澗者韋蘇州所曾遊

也今猶有賦野渡無人之句者乎王無功丞六合作醉鄉記吾夙慕之今復有茲人者乎如有之子飛書我報吾將囊詩載酒順下風膝行而前矣

龍與祥符戒壇院分韻詩序

明慶宗師虎巖良公清曠文雅一時名公卿皆樂與之交而余獨未及識也至元辛卯六月余游杭炎暑重赫旅棲偪仄如甌方鬱鬱不自憫有蒼頭持巨軸至曰良宗師約遊戒壇書也余疑與公未一覩面書何為至于

我發函伸紙列風流勝貴且百人而余亦與焉余嘉其
未相見情相親也敬諾之期既至僕痛馬瘡欲往不果
公以筭興速之又未果越翼日白廷玉來訪盛誇茲集
以為地虛曠堂宇峻潔脩竹叢杉蔥翠交陰芙蓉濯濯
清泚香氣襲人雖紳珮簪錫環列雜坐涼颼時至不知
門外之紅塵赤日也頃焉炷薰淪茗設伊蒲淨供楚徐
鳴琴溫老飛灑醉墨皆極天機之妙坐客霑飫投壺對
奕各適其趣則又析少陵已上人茅齋詩探韻以賦客

多詩字少或再韻或三韻雖遲余不至亦虛下字畀之
余並以不得與為歎廷玉復道公意俾余序其事余因
知公之心其空普無礙若此夫金僊氏之教世久益離
至于今日雞園弟子聲生執長聞有談周習孔者輒哆
唇瞋目以為詬病而公獨與賢士大夫游從款密豈非
外形骸以理自勝者哉余棲泊于茲未克一詣招之又
不克一徃宜以心雜見疎而公拳拳然願交而不可得
者果容我邪抑愧我也昔惠遠招范甯而甯不從許淵

明飲酒淵明復攢眉以去遠公終不以為忤其所用心
固非吾徒者所能臆度也雖然名人魁彥高詞嶮語駿
發蹈厲使余挂名其端而不知辭讓凝塵鼓缶安知鳴
玉者不笑于其傍乎重違公意廷玉又從而督迫之引
筆綴詞惻然愧汗覽者亮之而已

送盛元仁序

京口舊為江淮衝要四方賢士多樂居之德行之辭詞
藻之華論議之偉蓋昌黎所謂紛擾擾而既多者也余

幸以先人之故深之即高之求皆嘗辱師而友之兵燹
以來化為異物者衆矣其或一二僅存復歸老邑里潛
深伏隲聲跡藐不可見獨余尚縻于茲未能遠引索微
言于亂志發孤笑於羣憂亦惟吾元仁三數君子而已
而又各以衣食之故或出或處曠日彌旬乃獲一見見
已遽別回視承平時美景良辰肩從齒序登山憩石酣
觴賦詩殆猶夢寐間事欲再夢不可必得也而元仁學
日進文日工名譽日起余又疑其必為有力者奪之而

去幸而烏公之書詞馬幣未至洛北余猶得資以待老
聞之友朋乃謂其以太夫人在堂越明日將歸而就養
焉噫何其不預為我告也朋友固天倫之一熙春寒往
太夫人御板輿遠覽舊畿近周家園吾元仁奉一觴稱
千歲壽此人子之至樂也爾有母遺繫我獨無我方羨
慕之不暇吾亦安得而留之獨惜夫友道日以狹文氣
月以萎而吾所資以待老者一旦去而之千里之外是
則余之不能已已者也昔謝太傅中年與親友別輒作

數日惡達人尚爾況余之惟怯澠忍者乎春草碧色春水淥波送君南浦傷如之何吾雖有胸無心者將不能泊然于斯語矣雖然閒居續賦元仁肯從便風示我吾尚能與三數君子盥手發函對風簷而朗誦也

宋宣慰文集序

同知宣慰東明宋公余曩在揚嘗望履幕下別十年矣復會于杭出歌詩數十首及所為文以示余受而卒業因仰而言曰山林草野之士處隱就閒無所用乎世於

是刻志苦心蒐辭獵句以寫其幽憂抑鬱之思以舒夫
風刺怨懟之意乃若公卿大夫以功名事業為已任者
驅馳鞅掌日不遑給亦何暇及乎此今也摘竒掇異與
騷人墨客較其錙銖非韓愈氏所謂性能而好之者歟
至若鏗鏘幽渺沖澹和平使讀之者稽首歎嗟不能自
已又非韓愈氏所謂才全而能鉅者歟夫以才之全能
之鉅復根于性而好之則公之文固非曲學謏聞者所
能闖其藩也余獨于食餅之詩而重有感焉往歲浙右

大水民用蕩析鬻妻賣子延視息於須臾間其情重可
哀矣朝家憫焉亟發廩振之此正有司所當奔走奉承
者跨越半載方且覈戶口排丁稚其得升斗以活者亡
幾而罄罄然為溝中瘠者蓋不知其幾萬人矣而公於
一食之微憂民之憂惜怛懃懇溢乎言外則其心從可
知己詩不必論也嗚呼使當時任事者其心皆如公之
心吾知其皇皇汲汲食不下咽又肯稽國家之賜為之
躊躇四顧聽其流離死亡而後已乎此余所以重有感

也邇年西浙豪右擅江湖數澤之利富幾埒國田疇日以廣溝澮日以堙雨不浹辰又復巨浸官吏熟視莫敢誰何今歲秋冬之交其可慮者又不止如前二歲而已余安得取公之詩為司牧吾民者誦之捲錦以歸因為之序以俟夫觀民風者擇焉至元壬辰閏月五日

佩韋齋集卷十一

欽定四庫全書

佩韋齋集卷十二

宋 俞德鄰 撰

序

送蔣守文序

三山蔣君守文踵門而告余曰吾老矣故鄉之思日往月來於懷也時暑退舍涼颼颼然吾將歷吉而歸願以一言為我贈余曰遊子悲故鄉古嘗有是言矣歸燕泣隴豈獨人有是心哉鳥飛而返林兔走而還窟狐死而

首邱物皆然人為甚然人之勇於歸者蓋鮮也君青歲
出遊皓首歸里君誠不忘父母之邦者矣陵谷遷變井
邑蕭條今非異時比矣其念君而為東道主者誰乎適
百里者宿舂糧適千里者三月聚糧君距家幾三千里
君之聚糧凡幾月乎川有蒲澤之姦陸有綠林之暴其
為君之紀僕者誰乎喪亂以來耆舊親戚銷磨略盡某
邱某水孰能從君而指視者乎恍歸矣君得無渡桑乾
而思并州者乎君曰子之言是也然吾之歸已決雖道

塗險阻資用乏絕不暇顧也子試為之詩若序足矣余於是憮然曰君誠君子人也題柱而出乘駟馬車而歸棄繻而遊建節行郡國而返其歸誠易易也中世士大夫一不得志懼無以誇一時榮一鄉則棄其邱墓如棄敝屣今君年如是貧如是而不忍違其鄉如是則可謂之君子矣余年視君不甚相遠松楸之感竹篠之思亦久其日然猶戀戀未能舍去送君之歸得無顏怛怩而心不寧者乎既與之酒賁之錢又序以贈之蓋將以諗

於君之素所往來者而抑以自警也

盛童子遺稿序

余往讀邢氏子秋風辭愛其雄深窈眇神會天出然以時考之居實曾未冠也天假之年閱之以問學磨之以世故雖比良遷董兼麗卿雲直易易耳稟命不融其所成就竟如是而止談者愍焉然猶幸而蘇黃二老交口稱引故其名聲卒振響於世是則蚤慧而殀固居實之不幸而其遇二老以昌其詩抑又居實之大幸也錢唐

盛仁熟亦庶幾蚤慧者未齠齔從海陵陳君登父遊登父吾友也每訪余仁熟輒撰杖屨於其側色夷氣清足踧踖不敢縱扣所習詩書古史义手朗誦有異常兒余嘗謂盛氏有子矣逮少長學為古律詩援筆輒就時有不經人道語年十三病腸結一夕而死嗟乎何蚤慧而遽歿也昔居實之歿或謂其父有以致之恕誠傾覆者如仁熟之父則非有號位勢力足以誰何當世溷跡塵市之間經營什伯恂恂惟謹且不為詭偽浮薄之行天

畀以子不旋踵而奪之去神理固有不容語者矣九齡而失童烏百萬而貨王悅彼豈子雲茂宏之過哉景星慶雲須臾變滅沈海之珊瑚韞石之璞玉取以為器其堅久固徃徃不木石逮也然則蚤慧而夭亦何足深怪耶雖然居實之夭藉二老而名彰仁熟之詩固未得為居實比加以數歲安知來者之不如今也童心黃吻紛紛厭人如是子者乃不幸短命以死則其父其師亦惡能無戚戚於此悼其夭而哀之取其可傳者而壽之意

必擇能言之士足以傳於今而信於後者登父訪余乃
以其詩屬余而為之序噫余何人哉而能使是子之不
泯乎不過明天之命物者以紓其父之悲以釋其師之
憾而以祛夫世俗之惑而已若夫序之而使其詩之不
泯當世自有大手筆如二老在登父其亟圖之庶仁熟
之不死也

李侍郎母夫人慶壽詩序

仕而逮親雖三釜榮也親之不逮重茵而坐列鼎而食

弗榮也信斯言也則凡為人子者必汲汲然為三釜之榮可也蓼莪思報昊天罔極傷哉貧也生無以為養不過啜菽飲水以盡其歡若不足以為孝矣而聖賢之教則曰啜菽飲水盡其歡斯之謂孝居上而驕為下而亂在醜而爭雖日用三牲之養猶為不孝焉是非聖賢之與人異情也三牲之養固人子之素心苟得之不以道曾不如啜菽飲水之為樂也而奚拘于三釜之榮者乎若夫家溫矣祿厚矣有平反以悅雋母之顏無放肆以

貽嚴媼之慮是蓋天下之巨孝而中庸所謂誠身以悅親者也三牲云乎哉重茵列鼎云乎哉恒山李侯以廉平之政繼美世德足以亢其宗矣母氏年八十視明聽聰略無老人衰憊之態殆天有以相之者而侯也惟恐養之弗至所餘財儲之庫扁曰奉親俾善計者主其出納凡贏得過當率以備朝夕之養而家不與焉太夫人惟所意欲左右奉承唯謹於是學士大夫相率為歌詩慶羨之侯可謂能榮其親也已雖然幼吾幼必及人之

幼老吾老必及人之老侯方分菟符為二千石為朝家
司牧一郡凡我黎庶孰無父母吾親飫珍鮭之供彼亦
有藜藿之不糝者乎吾親被文繡之華彼亦有縉布之
不完者乎吾親厭絲竹駢羅之奉彼亦有顛顛困苦呻
吟而無告者乎居高廣則思無廬策駿逸則思無車夫
如是親親而仁民仁民而愛物輯百姓之福以貶吾親
之福豈惟福壽康寧太夫人得兼而有之詵詵蘭玉匪
伊競秀於階庭間吾意含飴弄孫之樂無復有踰於此

者矣詩曰孝子不匱永錫爾類盖言錫類所以為孝也
因為之序且繫以詩曰

蓼蓼蒿莪天天棘薪維父維母鞠育孔仁欲報之德昊天罔極甘旨之供豈不朝夕藜藿不給菽水盡歡飭身勵行以怡母顏較之列鼎彼危此安顯允李侯孝友具完慊慊為人矯矯為官曰有慈母一一平反一昆二季郁郁荆蘭清朝賀燕紫誥回鸞凡為人子稽首願觀我聞先民悅親有道反身而誠對越穹顙我侯為政德心

皦皦永肩爾心蘇枯澤槁曰維壽母天錫難老詵詵蘭
樹靜秀娟好生于階庭慰母懷抱我作此詩匪諛匪私
維侯之頌維侯之規

劉悅心詩序

鳬鷺既醉詠太平也故其辭溫厚而愉懌風降而黍離
雅變而板蕩閔亂亡也故其辭憂思而感傷其為體雖
不同然自文武成康之盛陵夷至于幽厲之削弱上下
世變殆數百年生于太平者固不覩夫國步之頻蹙而

過故宗廟宮室盡為禾黍者亦不知夫鎬京豐洛之盛
且大也故為鳬鷺之詩者彼一時為黍離板蕩諸詩者
又一時吾聖人萃而錄之蓋以明夫治亂盛衰存亡之
故設乎彼而戒乎此者也故曰正得失動天地感鬼神
莫近于詩詩其可以易言哉劉君仲鼎以累將重侯之
裔生長穆陵之朝當是時聖明繼承休養生息年豐俗
阜灝灝和寧文物典章魚魚雅雅仲鼎既以得之見聞
者而寓諸歌詠矣德祐元元之禍倉皇辟地顛沛流離

仲鼎復身履之已而鼎祚變遷金谷銅駝莽然荊棘仲
鼎又一寓于詩以摅其憤惋抑鬱之思然則仲鼎其深
于詩矣乎夫詠太平也而不過于諛閔亂亡也而不流
於激以一人之作而風雅之正變具焉是豈區區世俗
之所謂詩者獨惜其溫厚愉懌之辭一轉而為憂思為
感傷迄不得薦郊廟于隆平垂典冊於久遠是則為仲
鼎之不遇也雖然仲鼎方將攜琴書講道紫陽之下紫
陽吾文公闕里也輔頰遺唾杖屐故跡過者式之仲鼎

日遊其地日與其徒誦其詩讀其書論說辨難貫穿統
會使往聖之絕學有繼而前哲之微言不泯是正吾仲
鼎事所謂薦聲詩于郊廟者抑又其餘也詩惡足以盡
吾仲鼎之學乎序而申之姑以寓我惓惓期望之意云
爾

說

雜草說

居室之西有隙地衡從數十武老梅穉竹攢立叢倚間

移花卉雜焉趣雖未就暇之日杖履或可往來也積雨霽余攜壺造之蓴薈秦芥葦葦寧第蔚衆芳列植咸受蕪穢譬如善人君子不幸與儉壬錯處而彼反得以勝之余愍焉亟呼畦丁荷鋤而理且戒之曰芟夷之蘊崇之絕其本根吾將勞汝踰辰浹往視則菽菽然復茁矣余怒曰爾何慢余戒也鋤者曰嘻是稗草也其植根固其數蔓滋未易以人力去也余益怒有老圃睨而笑曰是非彼之罪也去衆草易去稗草實難子非學圃者固宜

為彼之咎也且子亦何惡於稗而必去之往古來今君子小人常相半於天下亦猶天之生是物也子亦能盡小人之類而去之乎故以堯為君而有共工以舜為君而有苗頑以湯武為君而有桀淫朋比皆此類也彼聖人者雖誅之殛之化之懷之而能絕之乎況今真淳久散澆偽日滋儒之稗以詩書發官家之稗以法令濟貪釋老之稗以談空覈玄恣欲工以奇技淫巧稗其業賈以抵巇射利稗其心子不彼之務去而顧規規然用力

於荒畦間吁亦惑矣余曰子之言是也然人之稗彼有位者能去之草之稗吾有力則能去之吾將勉其所可能者而不彊其所不可能者此吾所以為能也雖然小人猶稗也小人之難去固甚於稗之難去也堯舜禹湯文武不作彼小人之貫盈惡稔者天其不殪之乎吾力雖勸彼稗之根連蔓衍者隕霜其不殺之乎老圃笑曰條風至勾萌達吾將復言子評之余無以對于其去三歎而飲之酒

左近仁字說

東平左氏子持咫牘詣余曰吾名近仁里先輩以毅夫字之吾惡其俗也先生其為我易之余曰父之于子名之可也同官之于僚同姓之于昆弟同門之于友朋字之可也余于子僅一再覲面而敢字子乎字之且不敢而敢名之乎且子之名與字亦未嘗俗也辭愈堅請愈力余又曰仁者萬善之元也而剛毅木訥聖人固以為近仁者也惡乎俗古人命名義雖有五然太顛閔天不

以顛天而為嫌石惡陳逆不以惡逆而為諱展禽以禽
名解狐以狐名其俗甚矣而皆聞人也趙堯李舜名非
不嘉而人不以為美稱苗晉卿名子率同古帝王之名
而讒夫幾得以覆其族名豈有俗不俗哉吾子取仁以
為名取毅以為字吾見其美也未見其俗也抑吾聞之
名成乎禮字依乎名有因其名之美而抑之者有因其
質之偏而矯之者吾子之名信美矣然毅者果敢有為
之謂毅雖近仁也天地嚴凝之氣盛于西北北方之學

者固不患其不毅也吾子氣剛而貌嚴瞻視察察且年甚少更歷未甚深余謂非果毅之難深恐強恕之不易請以仲恕易其字可乎孟子曰彊恕而行求仁莫近焉天之生人均有是性亦均有是仁其所以殘忍忮刻靡所不至者不恕之心害之也恕者仁之端也已所不欲勿施於人語之所謂恕也施諸已而不願亦勿施于人記之所謂恕也是恕也即所以為仁也人能充夫恕人之心則反薄而歸厚以已而體物天地之塞吾其體也

天地之帥吾其性也民吾同胞物吾與也仁遠乎哉我
欲仁斯仁至矣然則以仲恕字子固將矯子之偏而歸
之全者也語曰有一言而可以終身行之者其恕乎請
因以為贈

李御史二子名字說

御史太原李君見其二子曰知子莫若父吾之二子長
也剛吾懼其過于猛次也柔吾懼其過于懦今將改所
以命使之顧名思義以矯其氣質之偏而全其性行之

粹子盍為我命之余曰剛美德也其過也則為猛為隘
為彊梁故必潛之書曰沈潛剛克矯其過也請命曰潛
以元昭字之潛而昭理也柔亦美德也其過也則為懦
為無斷為邪佞故必有立焉則善矣書曰柔而立亦矯
其過也然非有浩然之氣者不能立請命曰浩以元直
字之直所以養是氣也剛而潛柔而立此所謂善反之
而天地之性存焉者也雖然父之教子未嘗不欲其賢
子承父之教每不能以皆賢昔者伯魯無恤之事是也

潛也浩也繼自今孳孳問學矯其偏而歸之全防其過而止於善他時吾從御史遊相與上下其論使吾如韓退之在汴得交李生賢父子間可也不然吾將有辭于子矣

張聖瑞字說

張子謂余曰夢麟始生之夕先君子夢青蛇蜿蜒于襟袖間故以夢麟命之歲癸酉夢麟求試有司列家世氏名于淮閫閫之胥史訛麟為麟非先君子所命也夢麟

懼亟以告于淮東漕使郭公公于先君為外兄弟喜而謂夢麟曰麟瑞物也子何疑焉盍敬易之吾將以諗于而父而父尚無責也夢麟再拜謝既而叨預計偕登夢麟之名于天府先君喜于是請于先師以君瑞字之蓋亦識郭公語也嘗試以語友朋皆以為可或曰是嘗有姓同而字不異者裨官譏焉盍改諸夢麟徃來于懷也父子於夢麟忘年交也請是而正之夢麟將以告于廟余曰麟之為瑞昭昭也麟之出必有聖人在乎其位麟

為聖人出也不然則與常蟲凡獸亦何以異是則麟者
聖世之瑞也余請以聖字子可乎吾子信厚而文規行
矩步慎交而擇友不詭隨不忮刻信乎其麟之似矣矧
子之外舅挈山陽歸今職方氏使吾子乘時擢利其于
高爵厚祿猶探囊而取之乃今居窮處約敝歌古人日
以詩書圖史自樂則其為麟又可知已字以聖瑞于子
抑又何忤雖然往而必復者天之道窮而必通者理之
常吾子忱能體麟之含仁而懷義知麟之瑞聖而識時

深培固養不輕售以汙其德而辱其身他時聞有遭遇
休明使天下復見闢畦麟趾之化者非子也邪張子偃
然退避余曰麟哉麟哉其終于不遇哉因書以贈

義貓說

俞子之居貓之孳乳者三狸而黑者緣牆越屋人竊之
夜擊缶呼莫能得遺二子鳴鳴箱毯間璫珊蹙躡如有
望而弗至余甚憐之忽爛斑類虎文者即而視悲鳴顧
眄銜其一與已之子俱已復如之煦嫗哺乳惟均惟一

其白質黑章者感焉亦銜其子就之出入相覆迄于成
更相母子見者莫能辨吁亦異矣夫天地之間至貴者
人至賤者物至有識者人至無知者物彼貓之為物抑
又忍而妬者也往歲里人飼貓每產子輒親闕之余聞
之嘗掩耳弗忍聽及讀韓愈氏文記二貓相乳因疑而
未之信及今乃親見之豈物之性亦有具人之性者歟
然而尺布斗粟之謠既形于漢然其煮豆叔季之世往
徃有之是何人而反不獸若也兵燹十年東南黔首半

為魚肉一二寡妻穉子依草木幸存者兄弟親戚視之不翅路人飢寒困苦藐然不之顧室廬田園間猶有餘者至設陷穽奪而有之抑又何心哉昔李義府柔而害物史擬之以貓今視斯貓殆有類于世之所謂急義者而豈義府比邪吾故為之說使覽者或有愧焉是亦裨風教之一也

祭文

祭兩浙運使閑邪李公文

嗚呼人之云亡詩人孔悲所謂伊人流俗豈知不負天子不負所學有人若斯天民先覺上蠹吾國下螫吾民雖死萬萬奚足稱人吁嗟我公冰清玉潔踐敷四紀險夷一轍我誦所聞更僕靡終姑以目擊印于至公東南斥鹵紆邊裕國公將浙漕姦弊攸革昔者兇豎溪壑無厭民怨入骨貪叨尚饒自公蒞止蠲苛除姦牢盆日增積雪皓皓彼兇之暴膏血是腴獲一冒禁株連根連公之賦政仁恕平直有犯者懲無辜者釋二浙之民謂公

父兄庶幾慙遺以輔太平康莊未窮濫汜已迫公雖歸
全民實踴躍我昔聞公歷事三朝廉不言貧勤不憚勞
逮于混一宅牧南土暴傲是鋤鰥嫠是撫忠于而國孝
于而家端介有守悃悃無華恨我與公相見之晚發潛
聞幽意深語淺嗚呼我實么麼跡與世疎公獨我知薦
我公車匪我求公公實知我以我之迂何施而可杜門
掃軌著書立言庶規不朽慰公九原靈車遠邁丹旒翩
舉束芻祖道有淚如雨

代祭祖龔常卿文

嗚呼大父常卿塋以戊午既越十年乃葬祖母衙衙石
門雲覆五州原起來止樂哉斯邱乙亥季春修遭大故
兵刃墮突無骸不露維我祖隴既固既安亦罹斯酷摧
我肺肝時方艱虞倉皇掩骼抔土之恨籲天罔極惟我
先父畫惕夜兢改卜未遂齋志九京乾乾孤孽實承先
志苦塊荒迷罔敢失墜今此仲冬奉襄父靈祖塋未葺
局脊靡寧爰卜翼日祇告于墓敬遷祖妣反骨膺祔夷

衾孔好玄堂暫開魂其歸來以慰我哀

代祭叔龔朝奉文

嗚呼某以險釁夙遭閔凶生甫十歲父歿異封撫我育
我曰惟仲父時異事殊雖煦莫嫗斃斃子立至于成人
室弊風雨田荒棘榛考室弗構父蓄弗穫每一念至亂
我心曲蘇臺留滯轉燭半年豈不懷歸庶復舊羶夫何
驛計報以永訣殮不憑棺摧心傷骨嗚呼叔父神怡氣
清脫屣富貴冥心死生臨絕之言具嚴簡牘謂某克家

實覲面目嗟嗟孽子心慮困衡猶恐弗紹以忝所生況
茲門緒日就頽靡某之孱懦胡能振起祖考之德仲父
之功庶其相之以亢我宗

佩韋齋集卷十二

欽定四庫全書

佩韋齋集卷十三

宋 俞德鄰 撰

表牋

賀郊祀慶成表

以下代黃松岡

正月始和稱秩元祀昊天成命誕受多方顯閔其孚華夷胥懌中賀臣聞報本返始者郊之義親德饗道者天之心故齋戒飭躬而神光之耀谷嚴恭展事而祥露之流壇皆繇精意之上通匪但彌文之特舉以洽百禮曰

由一人恭惟陛下聖敬日躋聰明時乂舜齊七政羣后之瑞斯班禹立三年百姓之仁既遂爰諏吉且不藏盛儀金軒駕而黃道之清夷蒼壁陳而紫煙之蒼鬱捷書夕奏霽色朝澄嘉績多于先王宜永綏于九有介福于其王母益侈貺于二儀臣猥玷輔藩親逢熙事雖雖在宮肅肅在廟莫陪周士之秉文赫赫厥聲濯濯厥靈願頌湯孫之殷武

謝郊禮慶成肆赦表

饗帝于郊率百神而受職配天其澤混四海以為家雨

施雲行風移俗易

中謝

臣聞祭而受福繇天意之斐忱

赦匪惠奸欲人心之遷善矧當嗣服之始具嚴報本之儀率見祖考休有烈光肆受諸侯之覲亦右文母綏我眉壽更占厥後之昌將侈貺于三靈盍馳恩于九有舉

令黔首盡洗丹書恭惟陛下齊聖廣淵嚴恭寅畏內盡志外盡物可告神明車同軌書同文無有遠近博厚高明之降格輝胞翟闡之靡遺驛馬宵流金雞晨揭滌瑕

盪穢想圖圖之遊空敷偉鋪闕編詩書而無愧臣越居
近甸親覩寬恩蕩蕩巍巍均圓堯天之大穰穰簡簡益
占周歷之綿

謝賜新歷表

禹立三年爰謹授時之正商畿千里首叨頒朔之榮觀
聽聿新布宣惟謹中謝恭惟陛下宅中圖大咨牧亮工
兢兢業業撫五辰一二日而無曠怡怡愉愉奉太后億
萬載以承歡迺課歷於清臺誕賜書于方國以前民用

克享天心臣猥玷承流居慙玩歲夙興夜寐懼莫逭于
官刑東作西成豈不知于帝力

謝賜歷日表

戊辰

咨牧亮工會舜朝之五載以閏成歲授堯歷之四時昭
示成書具孚闔境

中謝

恭惟陛下握符御極協紀叙疇

兢業力行率欽天之丕憲怡愉色養致愛日之積忱脩
和屢格于年登整暇肆馳于月捷考一元之豐茂凝庶
績而撫辰乃嚴頒朔之儀庸正厚生之事臣敢不恪共

侯服夙戒民功春近漢畿共迓太平之運星臨吳分尚
觀乾度之祥

賀生皇子表

戊辰

龍飛在御利見大人熊夢協占乃生男子慶闕宗祏歡
動埏垓中賀洪惟聖宋之初基誕毓僊源之三葉星珠
聚緯昭瑞應于戊辰神筴演元復環循于甲子天啟卜
世卜年之永世生以似以續之賢前後合符古今鮮儷
恭惟陛下小心昭事大德曰生保佑自天受周成之百

祿肅雖在廟宜太似之多男上以承長樂之歡下以慰
寰區之望民職有利邦其永孚臣叨領輔藩忻逢盛事
告于皇天后土阻陪濟濟之班宜爾聖子神孫更上振
振之祝

謝生皇子肆赦表

履祥甲觀培萬世之丕基渙號端門開八荒之壽域照
臨所暨鼓舞攸同

中謝

恭惟陛下祗適先猷作新聖治

大人利見時適際于龍飛男子乃生瑞果符于熊夢載

震載夙克類克明日重暈月重輪益炳繼明之照天職
覆地職載是推不忍之仁開釋無辜咸中有慶臣躬逢
曠蕩職在布宣癘老願觀已喜漢恩之寬太子孫受祿
尚歌周室之盈成

誕皇孫賀皇帝表

運啓鴻圖三極會萬年之統謀詒燕翼一家垂數世之
仁勢壯本支惟騰率溥中賀臣嘗仰察天文之有赫預
占國祚之無疆三星為心重暉應太子之象十月建尾

有序驗多孫之祥熒然休苻萃于今日恭惟陛下道關
百聖澤被羣生卜世卜年統之正者系必遠以似以續
源之深者流必長培熙朝葛藟之基敷奕葉猗蘭之秀
和薰鶴禁喜溢龍顏臣越在輔畿欣逢盛事告于皇天
后土阻陪濟濟之班宜爾聖子神孫更上振振之祝

賀皇太子牋

同前

春宮毓德久隆燕翼之謀甲觀呈祥茂育龍駒之秀慶
關宗社歡動堪輿臣嘗仰察天文俯覩國運心為太子

之象暉重適應于三星尾有多孫之占氣運恰臨于十月於昭景貺式對昌辰恭惟殿下粹質天成新功日就左右前後悉皆正習近聖賢出入起居罔不欽喜形君父宜闡乾元之瑞有開震索之祥臣越在輔藩忻逢盛事踰瞻鶴禁雖莫窺射人卜士之儀仰紀鴻休尚當繼聖子神孫之頌

聖節進賀禮物表

臣某言恭遇云云聖節者伏以中天啓聖式逢華渚之

祥近甸承流庸效野人之獻遥伸虎拜俯竭蟻忱恭惟
陛下保合太和緝熙純嘏皇穹申眷乃聖乃神乃武乃
文大德懋昭得位得祿得名得壽臣叨分菟組欣際虹
流結想楓宸阻上三呼之祝將忱芹曝少供萬歲之觴
所有禮物別狀進貢

蝗不為災謝御筆獎諭表

天收飛孽喜登千里之金穰帝念承流特畀九重之奎
畫於昭眷獎有覲訓辭竊惟皇家開平治之期侯國闡

休祥之證由今揆昔宅牧惟良如劉敞之守鄆城蝗值雨而輒散如趙抃之守青社蝗遇風而退飛有若微臣冒茲近甸惟一意奉宣于聖化愧半期蔑奏于民庸如坻如京喜穀擬登于場圃食苗食節遺蝻間見于田疇方虞種類之蕃滋乃抱黍禾而焦殪妖不勝德知吾皇一念之潜通災反為祥俾闔郡羣生之咸遂僭函秉穗上徹凝旒遽沐溫綸曲加褒袞拜手稽首念三生結聖主之知以口語心顧一稔豈愚臣之力肆令吳會丕覩

堯言茲益恭遇陛下加惠黔黎如護赤子五穀熟而人民育迄銷遺癘之災三階平而風雨時允協維魚之夢迺賜書于方國特加賁于微蹤臣敢不勉竭孤忠對揚休命不書螽蜚已占魯史之有年斯饗羔羊願誦豳詩而稱壽

彗星肆赦謝表

夙夜畏威覩乾文而加警雷雨作解肆渙汗以維新洽于民心時乃天道恭惟陛下小心昭事大德曰生謹一

二日之幾每嚴勅命閱四十年之治宜底措刑仰以觀
天惕然垂象丕若成湯之罪已遠過宋景之出言細書
十行大賚四海臣叨分近甸亟廣寬恩有嘒明星見雲
漢化行之盛安如磐石惟箕翼國壽之祈

明堂禮成加食邑謝表

紫壇歲事莫陪顯相之勞黃屋疏恩亦被重封之賜寵
踰望外感溢由衷中謝伏念臣初乏猷為積叨祿秩忝
居田里分常謹于祝釐茲冒節麾心益勤于布澤雖忝

松階之末綴阻瞻茅屋之侵容不圖商賚之行俾預周
行之數茲蓋伏遇陛下禮隆並侑視廣同仁祝網去三
民庶舉需于敷錫列爵惟五子男皆得以序升肆令微
臣均膺懋渥臣祇承龍綍誓竭駑庸取三百廛邑入已
慙于多予制二千石職思何忍于素餐

謝賜臘藥表

恩畀節麾俯念吳江之冷寵分圭七欽承漢詔之溫獲
遂生全采深感刻

中謝

伏念臣自慙弱植欣際昌時撫

字服勞常恐祈寒之怨咨諏曠職凜懷愒日之虞修冬
籥之告邁佩宵衣之垂軫銀合重九天之賚綠綈榮三
輔之頒有此闕踰若為補塞茲蓋恭遇陛下八荒躋壽
一視同仁憐臣寒薄之蹤俾霑脂澤閔臣衰遲之景使
駐顏華臣敢不勉竭愚衷丕敬聖渥愧匪北門班之近
曷稱殊光重拜西山藥之良永酬大德

冊皇太子妃賀皇帝表

天啓燕謀彞倫攸敘朝敷鴻冊嘉耦曰妃歡洽寰區慶

綿宗祐恭惟陛下帝祉施于國本在家無射亦臨於緝
思齊之雖肅其儀不忒懋昭大學之修齊乃眷元良樂
求淑女酌熙朝之懿典陞儲壺之徽名乾坤父母之心
因親以愛咸恒夫婦之道利正而亨聖謨孔彰邦榮斯
慶臣猥叨假守忻睹彌文家人有嚴君始包二南之化
震器為長子永開重潤之祥

賀皇后箋

同前

坤極承天既施帝祉震宮立配乃厚人倫典冊一新宮

闡胥慶恭惟殿下黃裳襲吉彤管凝徽國之本在家將
協恭于寢膳上以風化下宜秩禮于婚姻樂得賢妃式
彰婦順侍青規之慈訓維德之行承紫殿之穠華其儀
不忒臣叨分郡寄忻際邦榮母道無疆已契含光之象
孫謀有永願賡繩蟄之詩

賀皇太子箋

同前

日有重光人倫以正天立厥配王化所基無疆惟休有
室大競恭惟殿下狗齊秉粹溫故知新闡大學脩齊之

章意必誠心必正迪家人威如之吉言有物行有恒載
嘉瑜佩之徽誕錫珉雕之冊兩儀並貺萬世其昌某叨
領輔藩忻逢盛際雞鳴鶴駕益毗問寢之恭魚躍鳶飛
願謹造端之始

周國公主下嫁禮成賀皇帝表

乾父有慶丕篤天嫔異女于歸式彰風化時匪輕于選
尚邦永侈于榮懷恭惟陛下經國範民敘彞敷訓有齋
貴主早迪教于公宮宜爾好逌俾服休于外館荒周邦

之吉壤舉究國之徽章舅氏如母存爰示因親之愛王
姬執婦道聿新歸妹之儀秩禮大昏以祉元吉臣忝聆
曠典阻綴賀班令德肅雖動協襄城之則慶源演迤長
留沁水之春

賀皇后箋

同前

后德正倫夙迪關雎之化王姬下嫁式歌唐棣之華築
館維新宜家慶恭惟殿下躬持節儉德著和平坤順
承乎天愛脩隆于母道異索謂之女禮庸飭于婦儀喜

溢慈懷吉諧嘉耦錫光順之冊迨其吉兮戒含章之粧
何彼穠矣臣濫膺郡寄忻際邦榮紫輦有行百兩翼軒
星之送絳河流彩六珈增姊月之輝

賀東宮箋

同前

帝乙歸妹禮重新昏震索謂男愛深同氣仰絳河之流
彩想青禁之騰懽恭惟殿下孝謹問安仁先敬長翟車
屆吉屬新築館之儀鶴駕肅將允助宜家之喜某叨分
近屏忻際休期迨其吉兮翕播桃夭之詠式相好矣永

聯棣夢之輝

謝知鎮江府兼淮東總領到任表

以下代
趙月山

林樊息影甫畀食祠郡國承流更叨給饗凜寵榮之狎
至俯愚陋以難勝伏念臣奮自諸生簡繇先帝際遇兩
朝之久踐敷三紀之餘導旨中樞無補訐謨之密除戎
外闡曾微攘卻之勞飲河之量既盈負嶽之譏莫遁潛
深伏隩政忻鷗鷺之相親昧進偷榮敢覲熊魚之兼得
倏承誤渥洊領寓邦亟伸偃倮之忱乃重峙儲之寄顧

賢能出守始流福以潤京師必趣辦有才始悉賦以輸
函洛有如遲暮曷稱選掄茲蓋恭遇陛下治在審官仁
先厚下念臣遭逢已久未忍于棄捐察臣悃悞無華尚
咨于牧餼遂令共二靡靳錫三臣敢不祇對龍光勉殫
鼃技以農言慰父老當恪布于漢條操贏闕佐軍興恐
未閑于晏筭

謝皇太后表

同前

茅檐息影甘混跡于漁樵琳館祝釐遽叨榮于牧餼愧

深負嶽德極戴天伏念臣猥以迂儒偶逢熙運入則中
樞之導旨出而外關之脩戎才薄力綿曾微報效器盈
量溢祗速顛隳一從畎畝之棲遲分絕雲霄之奮迅詎
圖簡畀俯及踦涼懷太守印章已駭郵亭之舊吏給刺
史鼓吹俾榮鄉黨之故人雖云恩重而命輕第恐力小
而任大盖河潤九里流福當藉于賢能而日費千金轉
饟政難于趨辦有如鴛鴦稱龍光茲盖恭遇陛下正
始道尊貽謀仁遠志存卷耳夙知臣下之勤音播思齊

克致邦家之御肆令遲暮復被選掄臣敢不免竭孤忠
對揚光命風德化以治郡願希二千石之良制課調以
救邊所愧五十條之奏

知鎮江府到任謝表

代孟
中齋

遲次西江甫安愚分易符北府條領誤恩控辭迄闕于
俞音黽勉遂祗于賤事伏念臣他無技巧惟有樸忠將
軍好武而子能文有慙父教先帝用老而臣尚少亦玷
郎潛銜命搶攘之秋承流凋弊之地進既無補退將自

修大人飛龍咸覩時乘之六康侯錫馬遽膺晝接之三
維京口之封疆實浙西之門戶民力竭矣謂宜寬之一
分江濤渺然所當護者數處曾是妄庸之品可兼牧御
之長蚊負嶽以難勝鵜在梁而弗稱茲盖恭遇陛下昭
哉嗣服成乃圖功以予萬億年用人民而永命其惟二
千石爰視邦而選侯遂使孤蹤亦叨異渥臣誓殫駑力
仰答龍光齊埭范橋希德人之遺愛韓船祖楫想烈士
之英風

狀

辭免知鎮江府申省狀

代趙月山

祠庭賦祿苟佚餘年潤浦承流洊叨舊職覲寵榮之過
盛亟偃避以敷陳伏念某猥以迂儒偶逢熙運入則中
樞之導旨出而外闡之脩我才薄力綿曾微補報器盈
量溢恐速顛隳一從畎畝之棲遲每荷乾坤之覆育詎
萌妄想復忝明揚倏仍禁殿之隆名再予輔藩之重地
舊愆盡滌新渥有光豈敢控辭以孤簡畀念昔先帝嘗


付是邦玩愒半期靡聞于善狀侵尋九載重見于遺氓
黔驢技止于一鳴鈐刀理難于再割加以浮家之寢久
茲焉卜築以暫棲雖無負郭二頃之田已有環堵一區
之宅昔騎竹而迎者久相爾汝且拔薤而誨者半就銷
磨知識衆則牽掣多疑懼深則瘳曠易胡能罄竭無負
布宣而況聰明不及于前時牧御轉難于今日若使小
知而大受亦敬弱步于豐扛再三以思無一而可伏望
公朝特賜敷奏俯憐真悃特返誤恩姑俾退閒式遂祝

釐之願別加遴選用宏植屏之規

再辭免知鎮江府申省狀

銜恩瘠地亟控忱辭錫命自天莫回誤渥威不違于咫尺
瀆敢至于再三伏念某奮自諸生來繇先帝桐鄉是
念曾日月之未多桑下何心亦風雨之攸芘混漁樵而
爭席饒雞黍以睦鄰逼社日遭田翁僅可誇于新尹坐
堂上稱太守終有愧于故山故雖勇棄鴈鷺之棲未必
果致蒲蘆之化下車攘臂儻為馮婦之撓求牧與芻秣

重距心之罪伏望朝廷亟賜敷奏收回成命改畀時髦
戰兢幸免于淵冰赴蹈敢辭于湯火



佩韋齋集卷十三